

SIMBINE SE JAAR FYN BEPLAN, SÊ AFRIGTER

Akani pak Bolt en Andre

Wim Pretorius

Sedert Akani Simbine die 100 m in Doha tydens die eerste byeenkoms van die Diamantliga-reeks gewen het, kan Suid-Afrikaners verskoon word as hulle wonder wat van hom geword het.

Simbine het 'n tyd van 9.99 in Katar aangeteken en onder andere met Jamaika se Asafa Powell, Justin Gatlin van die VSA en Kanada se blitsige Andre de Grasse afgereken. Dit was die eerste keer wat 'n Suid-Afrikaner dié item op 'n Diamantliga-byeenkoms kon wen.

Volgens Werner Prinsloo, Simbine se afrigter, was die plan van meet af aan om die 23-jarige Tukkies nie vanjaar te ooreis nie.

"Ons het dit so beplan dat hy nie te veel deelneem nie," het Prinsloo gesê.

Simbine, wat tans in Italië voorberei, het reeds vanjaar sy stem dik gemaak op die baan en spog met nie minder nie as vier van die wêreld se voorste tye in 2017.

Net Christian Coleman van die VSA was vanjaar al vinniger in die 100, met 'n tyd van 9.82 in Eugene, Oregon.

Simbine spog met die tweede (9.92), derde (9.93), sewende (9.94) en tiende (9.95) vinnigste tye van die jaar.

Verder tel nog twee Suid-Afrikaners onder die top10, met Wayde van Niekerk wat Dinsdag 9.94 sek. in Velenje, Slowenië, gehardloop het en Thando Roto 9.95 in Maart by Tuks.

Volgens Prinsloo sal Simbine op 4 Julie terugkeer na een van sy gunsteling-bane wanneer hy aan die Gyulai István-gedenkbyeenkoms in Boedapest aan die 100 en 200 deelneem.



Femi Ogunode van Katar (links), Akani Simbine, Justin Gatlin van die VSA en Asafa Powell van Jamaika was in 'n taal stryd in die 100 m gewikkel tydens die eerste byeenkoms van die Diamantliga-reeks in Doha.

Foto: GETTY IMAGES

Simbine het verlede jaar daar die SA rekord in die 100 tot 9.89 verbeter.

Twee dae later sal hy in Lausanne, Switserland, weer sy slag wys by 'n Diamantliga-byeenkoms.

Hy sal ook op 21 Julie in Mo-

naco in aksie wees.

Die wedloop in Monaco sal veral aandag trek nadat die Olimpiese legende Usain Bolt Woensdag aangekondig het dat hy ook daar sal deelneem.

Volgens Prinsloo sal dit waarskynlik Simbine se be-

langrikste wedloop wees voordat die Wêreldbyeenkoms in Augustus in Londen plaasvind.

"Nie net Bolt nie, maar waarskynlik ook De Grasse en verskeie ander groot name sal in Monaco hardloop. Dit is soos die finale groot kragmeting voor die Wêreldkampioenskap," sê Prinsloo.

Hy glo Simbine se voorbereiding sal verseker dat hy in Monaco slaggereed is.

"As die voorbereiding verloop soos wat ons dit beplan, sal hy ook in Monaco goed presteer."

Die nasionale kampioen het onlangs in Kingston, Jamaika, deelgeneem aan die Golden Spike-byeenkoms, wat Bolt se laaste op eie bodem was.

Simbine en Bolt het nie in dieselfde wedloop gehardloop nie, maar die Suid-Afrikaner se tyd was vinniger as die Jamaikaan s'n.